

VENDIM
Nr. 99, datë 16.10.2020

**AUTORIZIM I NDIHMËS SHTETËRORE “MBËSHTETJE FINANCIARE (GRANT)
PËR BIZNESE TË REJA ‘TË GJELBËRTA’, TË CILAT BAZOHEN NË NJË MODEL
EKOMIQËSOR OSE BIZNESE EKZISTUESE, TË CILAT TENTOJNË TË
SHNDËRROHEN NË BIZNESE ‘TË GJELBËRTA’, DUKE FUTUR ELEMENTE GO-
GREEN NË TO”**

(ndryshuar me Vendimin nr. 113, datë 11.12.2023)

(i përditësuar)

Komisioni i Ndihmës Shtetërore, me pjesëmarrjen e:

Znj. Anila Denaj	kryetare;
Znj. Mimoza Dhëmbi	anëtare;
Znj. Etleva Haka	anëtare;
Znj. Mirjana Zisi	anëtare.
Z. Ahmet Mançellari	anëtar.

Në mbledhjen e tij të radhës, të datës 16.10.2020, në Ministrinë e Financave dhe Ekonomisë, në bazë të ligjit nr. 9374, datë 21.4.2005, “Për ndihmën shtetërore”, të ndryshuar, dhe vendimit të Këshillit të Ministrave nr. 817, datë 28.12.2005, “Për miratimin e rregullores ‘Për procedurat dhe formën e njoftimit’”, morri në shqyrtim njoftimin e Bashkisë Tiranë lidhur me planin e dhënies së ndihmës shtetërore për fuqizimin e grave dhe nxitjen e sipërmarrjes.

I. Procedura

1. Bashkia Tiranë, me shkresën nr. 26214, datë 5.8.2020, në bazë të nenit 20, të ligjit nr. 9374, datë 21.4.2005, “Për ndihmën shtetërore”, të ndryshuar, njoftoi në Komisionin e Ndihmës Shtetërore planin e ndihmës shtetërore të sipërpërmendur, në bazë të vendimit të Këshillit Bashkiak Tiranë nr. 157, datë 26.12.2019, “Për miratimin e programit buxhetor afatmesëm 2020–2022 dhe detajimin e buxhetit të Bashkisë së Tiranës për vitin 2020” në programin 04130 “Mbështetje për zhvillimin ekonomik”.

II. Përshkrimi i masës

2. Objektivi: Plani i ndihmës ka si objektiv mbështetjen e sipërmarrjeve të rinj që aspirojnë të krijojnë biznese të gjelbërta dhe ndërmarrjet ekzistuese që aplikojnë parimet e ekonomisë së gjelbërt në prodhim produktesh dhe konsum lëndësh të para.

3. Baza ligjore e njoftimit të planit: Plani i ndihmës shtetërore është miratuar me vendimin e Këshillit Bashkiak të Tiranës nr. 157, datë 26.12.2019, “Për miratimin e programit buxhetor afatmesëm 2020–2022 dhe detajimin e buxhetit të Bashkisë së Tiranës për vitin 2020” në programin 04130 “Mbështetje për zhvillimin ekonomik”.

4. *Kobëzgjatja: plani i ndihmës do të zbatohet në periudhën 2020–2025.*

5. Dhënësi i ndihmës dhe autoriteti përgjegjës për zbatimin e masës është Bashkia e Tiranës.

6. Përfituesit: Përfitues: sipërmarrësit e rinj që aspirojnë të krijojnë biznese të gjelbërta dhe ndërmarrjet ekzistuese, që aplikojnë parimet e ekonomisë së gjelbërt në prodhimin produktesh dhe konsum lëndësh të para.

7. Shtrirja territoriale: Projekti do të zbatohet në territorin e Bashkisë së Tiranës.

8. Forma, vlera dhe intensiteti i ndihmës: Vlera e përgjithshme e fondit, për periudhën 2020–2022 do të jetë 36 000 000 lekë. Vlera e fondit për secilin vit do të jetë 12 000 000 lekë. Çdo përfitues do të mbështetet me grant të drejtpërdrejtë në shumën 500,000 lekë (pesëqind mijë lekë). Intensiteti i ndihmës do të jetë 80% të kostove të pranueshme.

III. Vlerësimi i ekzistencës së ndihmës shtetërore

9. Komisioni i Ndhmës Shtetërore vlerëson nëse njoftimi i skemës për mbështetjen e sipërmarrjeve të rinj, që aspirojnë të krijojnë biznese të gjelbërta dhe ndërmarrjeve ekzistuese që aplikojnë parimet e ekonomisë së gjelbërt në prodhimin produkteve dhe konsum lëndësh të para, përbën ndihmë shtetërore në kuptim të nenit 4, pika 1, të ligjit nr. 9374, datë 21.4.2005, “Për ndihmën shtetërore”, të ndryshuar, përbën një skemë të ndihmës shtetërore.

10. Neni 4, pika 1, i ligjit nr. 9374, datë 21.4.2005, “Për ndihmën shtetërore”, i ndryshuar, përcakton se:

“Përveç rasteve të parashikuara ndryshe në këtë ligj, ndalohet çdo ndihmë e dhënë nga burimet shtetërore, në çfarëdoq formë, e cila, në mënyrë të drejtpërdrejtë ose të tërthortë, shtrembëron ose kërcënon të shtrembërojë konkurrencën, duke dhënë përparësi për një ose disa ndërmarrje të caktuara ose për prodhimin e produkteve të caktuara, për aq sa mund të ketë ndikim në plotësimin e detyrimeve të ndërmarrja nga Republika e Shqipërisë në marrëveshjet ndërkombëtare që përmbajnë dispozita të ndihmës shtetërore.”.

11. Gjithashtu, neni 71, “Konkurrenca dhe dispozita të tjera ekonomike”, i Marrëveshjes së Stabilizim-Asociimit ndërmjet Komuniteteve Evropiane e Shteteve të tyre Anëtare dhe Republikës së Shqipërisë¹ përcakton se:

“Praktikat në kundërshtim me këtë nen vlerësohen në bazë të kriterëve që lindin nga zbatimi i rregullave të konkurrencës të aplikueshme në Komunitet, sidomos në nenet 81, 82, 86 dhe 87 të Traktatit Themelues të Komunitetit Evropian dhe instrumenteve interpretuese që përdoren nga institucionet e Komunitetit.”.

12. Ligji i ndihmës shtetërore zbatohet vetëm për masat që plotësojnë të gjitha kriteret e përmendura në nenin 4, pika 1, konkretisht: a) burime shtetërore; b) avantazhi ekonomik; c) selektiviteti; dhe d) efekti në konkurrencë dhe treg.

13. Bashkia e Tiranës ka njoftuar planin e ndihmës shtetërore, i cili lidhet me aktivizimin e burimeve shtetërore në formën e grantit, me qëllim mbështetjen e ndërmarrjeve të reja dhe ato ekzistuese të vogla dhe të mesme në territorin e bashkisë. Plani i ndihmës së njoftuar ka potencial për të ndikuar në konkurrencë dhe në tregti, duke qenë se përmirëson situatën ekonomike të disa ndërmarrjeve në treg.

Në këto kushte, Komisioni vlerëson se plani i njoftuar është ndihmë shtetërore.

IV. Vlerësimi i përputhshmërisë së skemës

14. Komisioni i Ndhmës Shtetërore vlerëson skemën e njoftuar, në përputhje me nenin 11 “Ndihma për investime”, të VKM-së nr. 513, datë 4.9.2018, “Për miratimin e rregullores ‘Për kushtet dhe procedurat e dhënies dhe autorizimit të disa kategorive të ndihmës shtetërore’”, pasi skema e njoftuar e ndihmës shtetërore përmbush si më poshtë:

- Mbulon kostot e pranueshme si vijon:

a) kostot e investimit në asete të prekshme dhe të paprekshme;

b) kostot e parashikuara të pagave, në lidhje me punësimin e krijuar drejtpërsëdrejti nga projekti i investimit, të përlogaritura gjatë një periudhe dyvjeçare.

- Investimi do të konsiderohet si kosto e pranueshme, pra në asete të prekshme dhe/ose të paprekshme për ngritjen e një ndërmarrjeje të re apo zgjerimin e një ndërmarrjeje ekzistuese, për të diversifikuar prodhimin e një ndërmarrjeje me produkte të reja shtesë ose një ndryshim rrënjësor në procesin e përgjithshëm të prodhimit të një ndërmarrjeje ekzistuese.

- Vendet e punës të jenë të krijuara në mënyrë të drejtpërdrejtë nga projekti i investimit.

¹ Ligji nr. 9590, datë 27.7.2006, “Për ratifikimin e Marrëveshjes së stabilizim-asociimit ndërmjet Republikës së Shqipërisë dhe komuniteteve evropiane e shteteve të tyre anëtare”.

Sa më lart, Komisioni i Ndhmës Shtetërore, në bazë të nenit 4, të ligjit nr. 9374, datë 21.4.2005, “Për ndihmën shtetërore”, të ndryshuar, vlerëson se skema mbështetëse me grant për ndërmarrjeve të reja dhe ato ekzistuese të vogla dhe të mesme në territorin e Bashkisë Tiranë, përfshihet në rastet e parashikuara ndryshe në këtë ligj dhe përbën ndihmë shtetërore, e cila është e lejueshme në bazë të shkronjës të nenit 8/1, “Ndihma shtetërore për ndërmarrjet e vogla dhe të mesme” dhe shkronjës “c”, të nenit 13, të ligjit nr. 9374, datë 21.4.2005, “Për ndihmën shtetërore”, të ndryshuar, e cila lehtëson zhvillimin e veprimtarive të caktuara ekonomike ose zhvillimin e zonave të caktuara ekonomike, deri në atë masë sa kjo ndihmë nuk është në kundërshtim me detyrimet e marrëveshjeve ndërkombëtare, të ratifikuara nga Republika e Shqipërisë.

PËR KËTO ARSYE:

Komisioni i Ndhmës Shtetërore, në bazë të neneve 4, 8/1, 13, 17, 22 dhe 31, të ligjit nr. 9374, datë 21.4.2005, “Për ndihmën shtetërore”, të ndryshuar dhe të nenin 12, të VKM-së nr. 513, datë 4.9.2018, “Për miratimin e rregullores ‘Për kushtet dhe procedurat e dhënies dhe autorizimit të disa kategorive të ndihmës shtetërore’”,

VENDOSI:

1. Të autorizojë skemën e ndihmës shtetërore në formën e grantit për “Mbështetje financiare (grant) për biznese të reja ‘të gjelbërta’, të cilat bazohen në një model ekomiqësor ose biznese ekzistuese, të cilat tentojnë të shndërrohen në biznese ‘të gjelbërta’, duke futur elementë *go-green* në to”.
2. Bashkia e Tiranës, brenda datës 31 mars të çdo viti, të paraqesë raport për impaktin e ndihmës shtetërore gjatë vitit paraardhës financiar. Raportet e zbatimit duhet të përmbajnë informacion të detajuar mbi shpenzimet e bëra dhe produktet e arritura.
3. Të gjitha të dhënat për zbatimin e skemës të ruhen deri në dhjetë vjet, pasi ndihma e fundit individuale të jetë dhënë në kuadër të kësaj skeme.
4. Ky vendim të botohet në Fletoren Zyrtare.

KRYETAR
Anila Denaj